

## 開放文學 – 歷代筆記 – 夷堅丁志 卷第十四

武真人 武真人名元照·會稽蕭山民女也·方在孩抱·母或茹葷·輒終日不乳·及菜食則如初·母甚異之·年稍長·議以妻邑之富人·既受幣·照執鞅不樂·訓以女工·坐而假寐·母答怒之·謝曰·非敢怠也·昨夢金甲神告以后土見召·與之偕往·入雲霄間廣殿下·見高真坐殿上·玉女列侍·招我升殿·戒曰·汝本玉女·頃坐累暫謫塵境·三紀復來·汝歸休·遂棄人間事·及覺欲不食·而母見強·又夢神怒曰·命汝勿食·違吾戒何也·剖腹取腸胃·滌諸玉盆·復納於腹而緘之·因授靈寶大洞法及大洞大法師回風混合真人印·俾度世之有疾者·母聞言驚悟曰·兒異人也·予為兒絕姻事·俾遂乃志·自是獨居淨室間·以符水療人疾·遠近奔奏求符·或邀過家視病·則命二僕肩輿以行·不裹糧·至中涂·從者餒·但市桃兩顆·呵氣授之·人食一桃·往數十里不饑·侍御史陳某·居錢塘·以天心法治人疾·舍旁別圃建層樓·圃人告有騎而行其上者·陳叱去曰·焉有是·薄暮攜劍印·宿於下·亦聞馬聲·未幾·家人扣門趣之歸·曰·幼女係空中·如物羈縻狀·視之信然·女昏不知人·累日·陳詣樓設醮厭之·火起壁間·食卒奔下·火亦止·又召道士攝治·及門亡其中·家人益恐·致書招元照·照衣冠造之·陳女起·迎門笑語·若初無疾者·照攜之宿樓上·越三晝夜無所睹·女亦泰然·韓子辰太尉裔官輦下·嘗自書章·擬奏於天·述遭遇太上興運事·人無知者·邀照奏之·俯伏良久乃起·誦章中語·無一非是·且曰·上帝嘉公恬靖無覬幸·批答雲·謹守千二日辨曹賞厥功·後皆應如所言·韓自幼患足疾·每作至不得屈申·照為按摩·覺腰間如火熱·又摩其脾亦熱·拂拂有氣從足指中出·登時履地·厥疾遂瘳·韓僕宿於廬側隘舍·夜夢鬼物壓其身·叫呼而出·值照至·不告之·故與縱步至其處·照及戶而返·曰·室有自縊者·蓬首出舌·見吾求度·即書符·命僕焚之·夜夢人謝過曰·吾得真官符超生·不復來矣·啟關而出·韓氏設榻留照寢·不聞喘息·徐見青雲起鼻端·一嬰兒長三寸許·色如碧流離·光射一榻·盤旋腹上·頃之不見·張循王家婢有娠·過期不產·請照往·諸婢雜立·照獨視孕者·咨嗟曰·爾宿生為樵夫·嘗擊殺大蛇·今故仇汝·在腹食爾五藏盡·乃已·急白王出之·書二符授婢·婢如戒焚符·以水飲訖·產一大蛇·王聞之大駭·敬禮之·欲贈以金繒·不受·復如韓氏·留歲餘·欲歸·止之不可·涕泣而別·言予不再至矣·眾疑其將羽化也·旦日·擊舟歸蕭山·至家無疾而卒·先是邑中十餘家·俱見照衣道服·各詣其家聚話·移時乃去·數日·或詣照家訪之·家人云死矣·邑子數輩先後至者·同日·昨方至吾家·何遽爾·驗其訪諸人日·乃屍解日雲·時紹興十一年也·韓俛廷碩說·

### 存心齋

趙善璉·與其弟居衢州·肄業城內一寺·榜小室曰亦樂齋·是歲獲解·而絀於春官·或為言樂與落同音·士子所深諱·而以名其居·宜不利矣·乃改為居易齋·久之·夢老翁高冠雪髯·來相訪·指而言曰·子所以易此者·正以樂字為不美·獨不思居易者·唐白樂天之名乎·白樂之稱·尤為未睦·璉謝曰·然則何為而可·曰·當命為存心齋可矣·覺而更之·遂以幹道五年登第·調章貢嶠官·為予言

### 明州老翁

明州城外五十里小溪村·有富家翁造巨宅·凡門廊廳級·皆如大官舍·或諫其為非民居所宜·怒不聽·財成而翁死·其子不能守·先是魏南夫丞相寓城中·無宅可居·及罷相來歸空橐中得千萬買之·家人時時見老翁往來咨歎·如有恨者·共以白丞相·為立小室·塑以為土地·自是不復出·徐閱說·

### 千雞夢

新安郡士人·夢雞數百千隻·飛翔廷中·時方應舉·疑非衝騰之物·以告所善者·或曰·世謂雞為五德·今若是其多者·千得萬得也·可為君賀·果登科·羅頡說·

### 武唐公

武唐公者·本閩州僧官·嗜酒亡賴·嘗夜半出·扣酒家求沽·怒酒僕啟戶遲·奮拳搥其胸·立死·逾城亡命·迤邐至台州國清寺·自稱武道人·素精醫技·凡所拯療·用藥皆非常法·又必痛飲鬥餘·大醉跌宕·方肯診視·然疾者輒愈·後浪遊衢州江山縣·豪族顏忠訓之妻毛氏·孕二十四月未育·武乘醉欲入視·顏曰·道人醉矣·須明且可乎·武曰·吾自醉爾·病人不醉也·遂入·又呼酒數升·乃言曰·賢室非妊娠·所感甚異·幸其物未出·設更半月殆矣·吾請言其證·平生好食雞·每食必遣婢縛生雞於前·徐觀其死·天明一飽食·終日不復再飯·審如是乎·顏生驚曰·誠然·武與約索錢至二十萬·始留藥一服·戒家人預備巨鉢及利刀·曰·即餌藥·中夕腹痛·當喚我·如期果大痛·急邀之入·入則毛氏正產一物·武持刀斷為兩覆以鉢·命婢掖孕者起·繞房行·明且·啟鉢視之·蓋大鰲也·首足皆成全形·目亦開·特為膜所絡·動轉未快·故不能殺人·顏生敬謝·欲償元約·且以所主酒坊與之·皆笑不取·曰·吾特戲君耳·建炎中·卒於國清·年八十餘歲·國清僧道益·從其學醫·話此事·

### 孔都

饒州獄卒孔都·素與酒家婦人游·一日過其門·用他故爭鬪·郡牙校夏生適見之·明晨·婦人訴於郡·夏生頗左右之·孔受杖·心銜其事·後數日·出至冰平監之東·欲買酒·而夏生又先在彼·望見孔入·從後戶佚去·孔徑回抵贖軍庫·以私醞告官·官乃追賣酒人並比鄰送獄·獄成·釀者坐徒刑·且籍產拆屋·四鄰皆均賞錢·夏生亦被罪·釀者當出賞百餘千·無以償·至於鬻其女·不勝怨·率鄰人共詣東嶽行宮·具訴孔夏私隙·遷怒破其家·祈神為主·是日孔在家·忽震恐不自持·呼妻子及裡人聚坐·過夜半·乃言遭十餘人見捕·賴此間黨盛·今捨去矣·天未曉·索衫著·出曰·當往獄官廳·是晚不還家·歷五日·或言有溺死於澹津湖者·孔妻驚疑必其夫·及廂官湧出屍果也·蓋孔挾一時之忿·致諸家撓壞如此·故神殛之雲·淳熙元年四月也·

### 白崖神

梓潼射洪縣白崖陸使君祠·舊傳云姓陸·名弼·終於梁瀘州刺史·今廟益盛·政和八年十月七日·蜀人迪功郎郭時·自昌州歸臨印·過宿瀨川驛·夢為二吏所召·行數里至官府·極宏麗·廳事對設二錦茵·廷下侍衛肅然·頃之·朱紫吏十輩·擁一神人·紫袍金帶·引時對立·時未及言·神顧曰·且易服·乃退如西廡·吏雲·王自言與君有同年家契·當受君拜·曷為不言·王甚不樂·時曰·王為誰·曰·射洪顯惠廟神·昔年瀘南安撫使英州刺史王公也·其子雲·今為簡州守·時始悟與雲實同年進士·甚懼·曰·然則欲謝不敏·且致拜可乎·吏曰·可·再揖至茵次·通敘委曲·因再拜·神喜跪受·勞問如世間禮·遂就坐·神曰·吾入蜀逾二紀矣·曩過陸使君廟·留詩曰·瀘州刺史非遷謫·合是龍歸舊洞來·一時傳誦·指為警策·暨以言事得罪·棄官謝世·獲居於此·獨恨王氏族人無知者·藉子之簡州告吾兒·時敬諾·寤後六日·至簡池·謁太守弗獲·不得告·明年過資州·復夢神召見·責其食言·時愧謝·神曰·是行必為我言之·吾近數有功於民·不久亦稍增秩禮命矣·時既覺·兼程至簡·以手書達所夢·太守感泣·訪手澤於家而得其詩·王公名獻可·字補之·自文階易武·仕至諸司使英州刺史知瀘南而卒·豈非代陸公為白崖神乎·龍歸洞之事·見於廟記·宣和六年·宇文虛中與雲同在河北宣撫幕府·為作記雲·

### 慈感蚌珠

大觀中·湖州人邵宗益·買蚌於市·烹而剖之·其一有珠·宛然羅漢像·偏袒右肩·短首左顧·衣紋畢具·觀者敬駭·遂奉以歸慈感寺·寺僧積藏·客至必出示·葉少蘊作詩云·九淵幽怪舞垂涎·遊戲那知我獨尊·應跡不辭從異類·藏身何意戀窮源·歸來自說龍宮化·久住方驚鷲嶺存·此話須逢老摩詰·圓通無礙本無門·一時名流屬和甚眾·曾公袞紆雲·不知一殼幾由旬·能納須彌不動尊·疑是吳興清淨水·直通方廣古靈源·月沉濁水圓明在·蓮出污泥寶性存·隱現去來初一致·莫將虛幻點空門·此寺臨溪流·建炎間·兩浙提刑楊應誠·與客傳玩·不覺越檻·躍入水中·四坐失色·亟禱佛·求之於煙波杳茫之間·一索而獲·葛常之立

方說

蔡郝妻妾

蔡待制之子某·建炎間·自金州陽令解官·避地入蜀·久之·得監大寧監鹽井·挈家之任·妻生男五歲女三歲矣·同處一舟·而蔡私挾外舍婦人·別乘一小艇日往焉·常相距數里·至暮或相失·妻密知之·平旦遣童持合至蔡所·曰·孺人送點心來·啟之·則二兒首也·蔡驚痛如癡·止桌以須其至·至已自刎矣·蔡竟與嬖人之官·持身復不謹·為郡守王君所按·其家多貲·悉傾倒以獻·僅得免·未幾亦卒·郝師莊者·嘗為忠州墊江令·後寓夔府僧寺·妻先亡·一妾有子·專家政·郝生招同寺人飲酒·或指牆而笑曰·此處獨無瓦·又光潔·得非僧徒夜逾垣至君內乎·郝信以為然·日夕訶責其妾·疑忌百端·雖小故不捨·妾不勝冤忿·伺郝曉出·即刃厥子·且藏刀衣下·郝聞變走還·門欲入·適別婢擁彗在前·瞬目使去·凶妾知不可奈·亦自戕·婦人天資驚忍·故殺子隕身而不憚·傳記中所載或有之·

郭提刑妾

政和末·陝西提刑郭允迪·招提舉木筏葉大夫飲酒·出家伎侑席·一姬失寵於主人·解逢迎客意·葉乘醉謔之·曰·吾從主公求汝·必可得·當卜日遣車相迎·姬大喜滿望·信為誠說·窮日夜望之·眠食盡廢·遂綿綿得疾·不能興·傍人往視病·輒曰·葉提舉車馬來未·明年元夕·忽自力新妝易衣·告人曰·向正約今日·而肩輿果來·我即去·才舉步·奄然而隕·蓋葉君酒間戲言·旋踵不記憶·此姬乃用迷著以致死·二司皆在河中府·時外舅為學官雲·

劉十九郎

樂平耕民植稻歸·為人呼出·見數輩在外·形貌怪惡·叱令負擔·經由數村·歷洪源石村何衝諸裡·每一村·必先詣社神所·言欲行疫·皆拒卻不聽·怪黨自云·然則獨有劉村劉十九郎家可往爾·遂往·徑入趨廡下客房宿·略無飲食枕席之具·明旦·劉氏子出·怪魁告其徒曰·擊此人右足·杖才下·子即仆地·繼老嫗過之·令擊左足·嫗僕如前·連害三人矣·然但守一房·不浪出·有偵者密白一虎從前躍而來·甚可畏·魁色不動·遣兩鬼持杖待之·曰·至則雙擊其兩足·俄報虎斃於杖下·經兩日·偵者急報北方火作·斯須間燄勢已及房·山水又大至·怪相視窘懾·不暇取行李·單身亟奔·怒耕民不致力·推墮田坎中·蹶然起·則身乃在床臥·妻子環哭已三日·鄉人訪其事於劉氏·雲二子一婢同時疫困·呼巫治之·及門而死·復邀致他巫·巫懲前事·欲掩鬼不備·乃從後門施法·持刀吹角·誦水火輪咒而入·病者即日皆安·予於乙志書石田王十五為瘟鬼驅至宣城事·頗相類·

雷震犬